

ATAYA KE AKWA AKAI-İKŪT
Exodus 25:8; 26:1-37; 27:9-21; 40:1-38
ŪYŪHŪ UKPEP-ŪKŪ 70

Eke İkpŵ Owo

İKŪ İBUOT: “Nnyin imenyene Akwa Oku emi edide ntem, emi ama ōsuhŵre etetie ke ubŵk nnasia ebekpo Andinyene-ubŵn ke mme Heaven, emi edide asañutom ke edisana ebiet ye ata Ataya, emi Jehovah okowukde, midighe owo” (Mme Hebrew 8:1, 2).

I Mme Item Ye Uduak Abasi Ke Abaña Edibŵp Ataya

1. Sia ntak edibŵp Ataya ekedide man Abasi okpoduñ ke otu Israel, ekedi akpan ñkpŵ ndinam ndisana item emi Abasi ōkŵnŵde, Exodus 25:8, 9; Utom Mme Apostle 7:45; Mme Hebrew 8:1, 2, 5; 9:20-26
2. Akpa ñkpŵ ke otu ñkpŵ inañ emi ekedade efuk esit Ataya ekedi linen ye mme cherubim emi edŵkdedŵk ndida mbana, Exodus 26:1-6
3. Ekenyene ndida idet ebŵt mfuk nte ōyŵhŵ iba, ye mben emi etimde enim tutu enam mmŵ ewŵrŵ efuk mben akpa ñkpŵ emi ekefukde, Exodus 26:7-13
4. Ōyŵhŵ ñkpŵ ita ye ōyŵhŵ inañ emi edade efuk ekenyene ndidi ikpa okukim emi etemde oyibe, ye ikpa badger, Exodus 26:14
5. Akana nte eda obukpŵk emi edade eme (gold) efuk mme obubŵk ñkpŵ inañ emi, ndien eda mme itiat idak isŵñ emi edade sidibe (silver) enam emum mmŵ ekama, ye eto emi edade eme (gold) efuk enyuñ emum mmŵ edian ōtŵ kiet emi esañade ebe ke ndudu mkpanuen emi edade eme (gold), Exodus 26:15-30; 30:12-16; 38:25-28
6. Ekenyene ndida ediye linen emi edŵkde mme cherubim edian nnam ukara emi edibaharede Ataya oro isin ke mbak iba, Exodus 26:31-35; Matthew 27:51; Mme Hebrew 10:19, 20
7. Ōfŵñ enyin-usuñ Ataya oro ekedi se edidade linen enam, ndien akana enyene ubŵk-usŵ ōdŵk-ŵfŵñ ke enye, Exodus 26:37, 38.
8. Akana nte eda linen enam ikpehe ekanare okure Ebiet-İduñ ekuk, emi mme adaha okpoho emi edoride sidibe (silver) ke ibuot emumde ekama, ye ikpehe enyin-usuñ emi enamde ke linen enyuñ edŵkde mme ñkpŵ ke nsio-nsio ñwet, Exodus 27:9-19

II Ediwuk Ataya Ye Edibon Mme Ñkpŵ Mbana-Ufŵk

9. Ekenyene ndinim Ekebe ke Ata Edisana Ebiet ke edem ukara, Exodus 40:1-3, 17-21; Mme Hebrew 9:3-10
10. Okpokoro, uwuk utuen-ikañ ye itie ufŵp incense o-gold ekenyene ndidu ke Edisana Ebiet, Exodus 40:4, 5, 21-28; 27:20, 21; Leviticus 24:1-9; Mme Hebrew 9:1-2
11. Ekenyene ndinim itie-uwa okpoho ye akpañkpañ uyere mmŵñ ke efe esop ke iso enyin usuñ Ebiet-İduñ, Exodus 40:6-8, 29-33
12. Akana eda aran eyet Ebiet-İduñ ye kpukpru se idude ke esit enyuñ enim mmŵ ke edisana ñkpŵ-utom, Exodus 40:9-12; Mme Hebrew 9:19-23
13. Ekenyene ndiyet mme oku mmŵñ, eyet aran, enyuñ enam mmŵ esana ke abaña idaha utom mmŵ, Exodus 40:12-16
14. Ubŵn Abasi ama ōyŵhŵ ke Ebiet-İduñ, nte Abasi ōkŵñwŵñŵde ete edidi ntre, Exodus 40:34, 35; 25:21, 22
15. Adaha obubit-enyŵñ ke uwemeyo ye adaha ikañ ke okoneyo ekedi nda-usuñ Israel, ke ediwak isua mmŵ ke akwa akai-ikŵt, Exodus 40:36-38; Numbers 9:15-23; Isaiah 4:5, 6

SE EKPEPDE EBAÑA

Ntak Ebŵpde Ataya

Mbemiso Nditŵ Israel ekesim Isŵñ Eñwŵñŵ mmŵ, ke ini mmŵ ekesuk eyode ke akwa akai-ikŵt, Abasi ama oyom ndinyene ebiet iduñ ke otu mmŵ. Enye okoyom ndinyene ebiet emi edinimde okpokoro Esie kpukpru ini, ebiet emi ekeDOMode utuenikañ Esie kpukpru ini ye ebiet emi mme oku kpa mme asaña-utom Esie ekenamde utom kpukpru ini. Ke utŵ usuñ emi Enye okoyom ndisuk ñkpere ikŵt Esie, man Enye ekpekpep mmŵ, akpada mmŵ usuñ, onyuñ ekpeme mmŵ. Ekedi uduak ye udŵñ Esie nte mmŵ ekpenam ñkpŵ enŵ Enye ōfŵn akan, man okpoto ke edinam emi ndien utom emi Enye okonimde mmŵ nte idut ndinam ōyŵhŵ; man mmŵ emi ema “ekeyak ikŵ Abasi esin mmŵ ke ubŵk” ekpedi usuñ emi akpan uduak, ibet ye ima Abasi edibede ayarade ōnŵ ofuri ererimbot.

Ndinam emi osu, Abasi ama ōnŵ isuñ-utom Esie Moses, mme ibet ye mme ewuhŵ ndida ñkpep mmŵ. Ñko, emi ekedi edinam ukpono Abasi emi akanyande ubŵk owut edito ke Heaven ndi ke isŵñ akwa anana ekŵm-urua Ñkpŵ-uto emi edikpede ekŵm-urua ufak owo onyuñ ōyuhŵde mme udŵñ edinen ikpe Abasi. Uduak emi ama okpon tutu

ekenylene ndida mme owo usuñ ke nde ke nde tutu ekeme ndiyarade mme ukoñ ye utuño uduak Abasi emi nno ubon-owo. Kiet ke akwa uduak emi ekedi ndibop ebiet ukpono-Abasi me ebiet-iduñ Abasi emi ekemedede ndinam mme udon ñkpọ Spirit nditọ Israel ke ini oro oyọho.

Ebiet Iduñ Abasi

Ataya ke ini oro nte ebiet-iduñ Abasi ke ufot ikot Esie ekedi ndiwut edidu emi Abasi okodude ke ufot mme owo, ndien mi ke ekekeme ndisio isop mme idiok-ñkpọ mmọ. Emi ekedi usuñ ndisaña ñkpere Abasi idem. Edi enye ekedi ata ñkpọ emi okokponde akan oro. Enye ekedi mbiet enọ mfon ita anditiene-Christ, oro edi, edifen ke mme idiok-ñkpọ, edinam-asana ye uduok-mmọñ Edisana Spirit ye ikañ emi Abasi okonwoñode onyũ onode mmọ oro eyomde mfon-mma Esie. Ke ntre otim owut Christ emi okoduñde ke ufot mme owo, ye akwa uwa Emi Enye ekenyenede ndinam, okoro ye utom edisine-ufot emi Enye edidade itie ke Enye ama ekekpe ekom-urua erifak nnyin. Enye, ke idemesie, ekedi ukem mbiet “nti ñkpọ emi edidide,” nte mme oku emi ekenamde utom ke esit esie ekedide mme mbiet akwa oku, Jesus Christ, me nte mme utom ke idem mmọ ekedide mme mbiet nsio-nsio usuñ emi Abasi osobode ye ikot Esie ke ini Mfon emi.

Enye ama onim Israel ye nnyin ñko usuñ Akpanikọ iba ke iso: Abasi ndisaña ñkpere owo, ye nnen-nnen ido emi owo asañade ekpere Abasi. Owo ndisaña ñkpere Abasi, ebe ke edituak ibuat ke Ataya emi enyin okutde, ekenam emi ebe ke ibat-ibat owo ke ini Ibet. Mmọ emi ekedi mme Akwa Oku, ata mmọ emi eketode ke ubon Aaron. Edi ke ini Mfon emi, owo kiet-kiet ekeme ndisaña ñkpere Abasi, ebe ke obufa ye odu-uwem usuñ oro edi, Iyip Jesus, onyũ obọ uwak mfon ye udori, emi owo mikemeke ndinyene ke ini Akani Ibet.

Usuñ ikoduhe nte ekemedede ndibe nsim Edisana Ebiet ke Ataya ke owo mibehe ke efe esop, ebiet emi ekenimde itie ufop uwa emi ekefende mme idiok ido enyũ eyetde ubiomikpe mme idiok-ñkpọ efep. Usuñ efen ikonyuñ iduhe nte ekemedede ndisaña nsim Edisana Ndisana ke owo mibemke iso ibe itie-uwa gold ke Edisana Ebiet, ebiet emi ekeyetde nda-mmana idiok-ñkpọ ke esit idem esio. Nnyin imekeme ndikut ndien ite ke ikemeke ndinam owo emi mibemke iso ibọ utebe-ikpe ke mme idiok-ñkpọ asana; ñko owo ikemeke ndibọ uduok-mmọñ Edisana Spirit ke mibemke iso inam enye asana.

Kpukpru Se Ibañade Utom Edibop

Ke nditim ñkere mbaña mme ñkpọ-ntibe emi ewetde nte okotibede ke ediwoyo ke Egypt ama ekebe (Exodus 12:2; 13:4; 19:1; 20:18; 34:28), ebat ete ke utom edibop Ataya okotoño ke ñkpọ nte ofion itio kiet ama ekebe toño nte Israel ekekpọñ Egypt. Ke ntre ema eda ofion itio kiet ke edibop esie. Mme owo ema enọ mme ñkpọ utom oto ke unyime-esit mmọ (Exodus 25:1-8; 35:4, 21-29; 30:12-16), ñko nnyin imokut ite ke mmọ ema ewut ata utibe udon ke utom emi enyũ eneñere enọ awak akan nte ekeyomde. Ema ebat okuk emi ekebiatde ke utom edibop ekpere ndisim \$1,500,000 oro edi ke okuk America.

Iyekut, ke ukpep-ñkpọ emi ite ke ekebon utom edibop emi ke ediwak mme ñwoyo-nda ikpehe. Akpa ekedi ebiet emi edade obukpok ebop, emi unioñ akande ubom, esin ke mme socket emi edade sidibe enam, emi eto emi ebete ke ndudu ñkpa-nuen emi edade eme enam enyũ emumde edian otọ kiet. Ekeda eme emi baba mbat me ndek ndomo kiet miduhe efuk mme eto oro.

Enyũ eda mme ofon ikpehe efuk ofuri se ekebope. Akpa ekedi ofon Ebiet-Iduñ emi ekenamde ke awawa, purple ye ididuot ofon linen duop emi edade saña-saña ñkpaha ekim kiet edian ye eken. Emi ekedi udomo nte okponde ekem ndifuk enyof, edem ye ñkañ mbiba ke idaha unioñ cubit kiet ototoño ke isof. Ema enam mme cherubim ubok-uso esin ke esit ofon oro.

Efiak eda ofon-tent emi enamde ke idet ebote edori ke enyof ofon Ataya. Emi ama okpon akan ofon Ataya, eyire mbak duopekiet utu ke duop. Enye ama okono osuhore osim isof onyũ ofuk ata ediye ñkpọ enye emi ebanade onyũ okono ke esit ofuri-ofuri, emi ekedade ke esit ufok kpọt ekut. Mben emi ekimde ufuk-ñkpọ emi enamde ke idet ebote eyiri ikadaha nnen-nnen ye mben emi ekimde ofon Ataya ke ini efutde ofon iso usuñ Ataya, emi akanamde akpa ubak ofon odobi ikaba ke ediande otọ kiet. Emi ama esiri kpukpru ufañ onyũ añwam uñwana, ntoñ ye mmọñ okube oduk. Mme akpatre ufuk-ñkpọ ekedi ikpa okukim emi etemde oyibe, ye ikpa badger emi ekekukde usuñ abaha se ededi emi eketode añwa esien.

Ekeda ukara linen ekwe ñkañ iso Ataya, edi ukem ke mme ñwet nte ofon Ataya, emi ekimde ñwet ndise emi ekewutde Moses ke Obot Sinai.

Ukara ama okono ke Ataya ndibahare enye nsin ke ikpehe iba, ekot ikpehe kiet Edisana Ebiet enyũ ekot enye eken Edisana Ndisana. Mme oku ekeduk ke Edisana Ebiet ke usen ke usen ndinam mme utom mmọ. Edisana Ebiet ekenylene uñwana esie oto akwa uwuk-utuenikañ gold. Mme Akwa Oku ikpon ekesiduk ke Edisana Ndisana, ndien oro ekedi ini kiet ke isua, ke Usen Usio-isop. Shekinah ubon Abasi okono uñwana ke ubet emi, ndien owo ikayakke ata uñwana emi otode añwa oduk do.

Efe esop ama odu akanare Ataya emi, emi ekedade linen enam ikpehe esie, cubit ition ke idaha. Efe esop emi ekedi cubit 100 ke unioñ onyũ añwana cubit 50. Ataya ekedi cubit 10 ke idaha, nditọ Israel ema ekeme ndida ke

edem ikpehe nkut enye nte mmọ esañade edi ndifọp uwa mmọ me ndibọn akam ke mme ini ukpono Abasi mmọ ke usen. Ema eda ikpehe linen emi ekimde eye ekwe inua-otop ke iso efe esop nko, ukem nwet ọfọn ikpehe emi ekeyiride ke enyin usuñ Ataya. Efe esop emi ekedi mbiet ubiomikpe ke idiok-nkpọ.

Nkpọ Mbana Ye Se Mmọ Edade Enọ

Ke efe esop ema enim itie ufọp uwa, emi ekekotde itie-uwa okpoho. Ke ufọt itie-uwa ye ata Ataya, ema ediok akpañkpañ uyere mmọn. Sia edika ke itie-uwa ekedide ke ntak idiok-nkpọ ye ndiyom erifen, sia edide do ke ekesifọp uwa ke abaña idiok-nkpọ, eneñere ekut itie-uwa okpoho nte mbiet utebe-ikpe, me edinyaña nsio ke idiok. Akpañkpañ uyere mmọn edi mbiet edina uduok-mmọn ke mmọn.

Sidibe emi ekedade esin mme itiat idak isọn Ataya ye mbana emi ekebanade mme adaha emi ekekoñde ikpehe linen ekanare efe esop ekedi ke usuñ emi owutde nnyin ete ke emi edi mbiet ekom-urua erifak nnyin. Mmọ oro ekedide ebine Abasi nte ata mme okpono Abasi ekenyene ndibọ erifak. Imokut emi ke Exodus 30:11-16. Emi edi ediyarare nwut nte ke kpukpru etak, kpukpru eyom erifak ukem-ukem. Owo inyene ikenyeneke ndinọ awak akan ibat emi ekenimde emi ekedide ibio-shekel kiet (emi ekpere ndidi 50 kobo ke okuk nnyin), nko ubuene ikenyeneke ndinọ ọsuhọre akan. Ekekot emi okuk usio-isop. Ke ikọ Abasi nnyin kpukpru inyene ndikpe ukem ekom-urua mbọ erinyaña oro edi, ọyọhọ ediyak idem ye mme usuñ nnyin nno Abasi. Iduhe mmọ emi esiode urua enọ inyuñ iduhe baba kiet emi enyenede ndikpe awak akan.

Edisana Ebiet etiñ abaña enọ mfọn Abasi ọyọhọ iba: Edinam-asana ofuri-ofuri (Mme Hebrew 13:11-13). Ema eyet iyip ndusuk unam emi ewade ke nnuk itie-uwa gold, emi nsuñikañ incense okotode ọdọk ofuri ini ebine Abasi. Edika iso mfọp incense emi ekedi mbiet akam ye edisana ebuana emi edude ke esit owo emi enamde asana ọyọhọ-ọyọhọ idighe ke esit emi osuk enyenede oduñ obukidem ye idiok-nkpọ ke enye (Psalm 14:2). Akanam owo ikadaha esen ikañ me incense idori ke itie-uwa gold. Edieke akanade enam ikañ asak akan ke ini ekededi, ekenyene ndisioño ukañ nto itie-uwa okpoho emi akananam owo miyakke ikañ enime, emi ubok Abasi ekebemde iso odomo.

Ema edori uyo ke enyọn okpokoro gold, emi ekedide mbiet udia spirit emi otode ke ebuana emi odude ke ini nnyin idukde Edisana Ebiet oro edi, enọ ọyọhọ Edinam-asana. Uyo emi akanam ikabakere idi akani inyuñ ibiarake, koro ema ekpuhọ mmọ kpukpru Sabbath. Emi owut nnyin ete ke nnyin inyene ndika iso ndi ke okpokoro Ọbọn ndidia udia. Mme edidiọn urua emi idikemke urua efen, edi nnyin inyene ndikaka iso mbọ obufa edidiọn. Emi edi akpan nkpọ adaña didie nko, ke kpukpru Usen Ọbọn, akpan-akpan, ke ini idide ke itie emi Abasi osiode onim onyuñ okponode nte ebiet emi spirit Esie oduñde, ndibọ obufa udia nto Enye.

Udiok-utuen-ikañ gold oro ekedi mbiet uñwana Ikọ ye udomo Edisana Spirit emi enode owo kiet-kiet ke ufok-Abasi Christ, man enye ekpedi uñwana ọnọ ererimbot (Eriyarare 1:12, 20; Matthew 5:14). Akanam ikañ esie inimeke edi akakaka iso asak oto ke ntiñ-enyin ye editim mkpeme ikaba ke usen. Ekedi ata edisana aran olive kpọt emi nditọ Israel enode nte enọ ima-esit ke ekessin ke mme uwuk candle emi.

Efen ekedi akwa ikpehe emi owo mikedibekede isio ke isua oro, tutu Usen Usio-isop. Enye akañwam ndibahare Edisana Ndisana, emi Ubọn Abasi okodude ye Edisana Ebiet emi ekedade iyip do man eyet idiok ido uduot-owo ye nda-mmana idiok-nkpọ. Nte mme oku emi ekenamde utom do ekeyohode ye uteñe Abasi nte mmọ esañade ekpere ikpehe ke usen ke usen, enyuñ efiokde ete ke nkañ eken ọyọhọ ye ubọn ye ndik ye uyama akwa Abasi ibom.

Ke edem ikpehe oro Ekebe Ediomimi ama odu, ekebe eto emi edade eme efuk, emi ekedọñde mme itiat nwed Ibet. Ke oro ebede, ema esin eso gold emi manna okodude, esañ Aaron emi ekesehede ama odu do nko (Mme Hebrew 9:4). Okukip Ekebe Ediomimi ekedi ata gold ekenyuñ ekot enye Nkpọ-itie mbom. Ke enyọn esie, mme cherubim gold iba eda etuk iso ese Ekebe Ediomimi ye se idude ke esit esie.

Edisana Ndisana ebiet edi mbiet akwa ọyọhọ enọ ita, uduok-mmọn Edisana Spirit, emi ekenamde emem owo ndibọ ke ini ikpehe Itie-ukpono Abasi akasihade ke mkpa Christ, emi ekenyuñ ebemde iso enọ ke Ubet Enyọn ke usen Pentecost. Abasi ke ọnwọñode iberedem emi ọnọ nnyin ọkọdọhọ ete ke Enye ama edi ke esit nnyin, Enye eyeda nnyin usuñ oduk ke ofuri akpanikọ. Ekebe Ediomimi, ye mme itiat nwed ekabade, ndien, edi mbiet ikọ Abasi ke esit nnyin. Mme cherubim edi mbiet edinam Ibet Abasi, ndien Nkpọ-itie Mbom edi mbiet Christ nte Enye adade ke ufọt edinen ikpe Abasi ye ibet ye edinam enye, man ubon owo okutak ke nsinsi.

Ebiet Emi Ekewukde Ataya

Ekebọp Ataya emi ke ufọt nna Nditọ Israel. Okure esie akasak iso ese usiaha-utin. Abasi ọkọdọhọ Moses ete enye owuk ufok-ọfọn esie ye mme ufok-ọfọn Aaron ye eke mme oku eken ke iso okure efe esop. Mme Levi ekenyene ndinam nna mmọ nkanare efe esop ke nkañ mbita eken, ndikpan mmọ eke minamke esana ndisaña nkperere edisana ebiet iduñ nkaha ke ini emi midotke me ndidighi enye ke ido nte mmọ emama. Mme esien eken ekenyene ndinam nna ke nkan mbinañ, ubon ita ke nkañ kiet.

Ke ini Abasi okoyomde nditọ Israel ndisana nka iso, obubit-enyọn odororede ke Ataya aka iso-iso. Mme oku eduk ke esit Ataya etañ ndisana usin-nkpọ ye mme nkpọ-utom, ebọp mmọ ke nsio-nsio nkpọ ye ọfọn emi ekekoñode ke Ataya. Ekem mme Levi ebe iso, owo kiet-kiet onyuñ emen nkpọ eke Abasi ọkọñode enye uyo ete obiom, adaña

nte ekemde ye ubon esie. Ke esimde ebiet nna efen mme Levi esosop idem ewuk Ataya oro, utom mmọ ke udim isañ oro ekedi ndikut nte ke ema ekewuk Ataya ke Nditọ Israel eduñ ke mme nde emi enode mmọ ndutime iduhe.

Esit Nditọ Israel emi ama akakpa mba ekedemere adaña didie, udọñ ini oro okonyuñ okpon adaña didie, idara onyuñ otọ oyọhọ kpukpru esit ke ini ekecutde obubit-enyọñ oro nte osuhorede ke Ataya ke isọñ ke akpa ini oro ekewukde Ataya! Abasi ama enyene ataya ke otu owo ke ini oro; ndien adaña nte mmọ ekekade iso enyene ndik Abasi, ubọñ Esie “ama oyọhọ ke ataya” (Exodus 40:34), mmọ enyuñ efiok ete ke mmimọ imenyene Ada-usuñ emi mikpaha mba ye eti Ebiet-ubọhọ.

MME MBUME

1. Nso edi ntak emi Abasi okonode uyo ete ebọp Ataya?
2. Siak nkpo inañ emi ekedade efuk Ataya oro.
3. Nso ikotim ibahade idem Ataya? Nso akwa nkpo-ntibe akada ukpuhore edi ke ubahare emi ke ini iso?
4. Nso ke mme socket sidibe, me, mme itiak idak-isọñ eda eno? Mmọñ ke ekeda ukwak eto?
5. Nso ke ekeda ebọp efe esop? Ekebahare enye didie ye nna Israel?
6. Nso nkpoduoho ekedu ke efe esop?, ke Edisana Ebiet? ke Edisana Ndisana Ebiet?
7. Didie ke Israel ekefiok ini ekededi emi mmọ enyenede nditọñ isañ mmọ?
8. Mme anie ekenam nna ke iso Ataya? Ke nkañ esie kiet-kiet?
9. Didie ke Israel ekefiok ete ke Abasi enem esit ye mmọ onyuñ odu ke otu mmọ?
10. Tiñ nkpo baña nsio-nsio utom mme Levi ye mme oku.